

ТАНИЛЦУУЛГА

“Монгол Улсын Засгийн газар болон Бүгд Найрамдах Солонгос Улсын Засгийн газар хоорондын богино хугацааны зорчигчдын тээврийн хэрэгсэл жолоодох болон жолоодох эрхийн үнэмлэхийг харилцан хүлээн зөвшөөрөх, солилцох тухай хэлэлцээр”-ийн тухай

Монгол Улсын иргэдийн гадаадад суралцах, ажиллах болон бизнес, аяллын чиглэлээр харилцан зорчих явдал нэмэгдэж байгааг харгалзан монголчууд ихээр зорчиж, амьдарч, мөн ажил хөдөлмөр эрхэлдэг улс орнуудтай иргэдийн эрх ашгийг хамгаалах чиглэлээр гэрээ хэлэлцээр байгуулах асуудалд тус яамнаас анхаарал хандуулан ажиллаж байна.

Дээрх асуудлын Бүгд Найрамдах Солонгос Улстай “Монгол Улсын Засгийн газар болон Бүгд Найрамдах Солонгос Улсын Засгийн газар хоорондын богино хугацааны зорчигчдын тээврийн хэрэгсэл жолоодох болон жолоодох эрхийн үнэмлэхийг харилцан хүлээн зөвшөөрөх, солилцох тухай хэлэлцээр”-ийг байгуулахаар төслийг тохиролцоод байна.

Энэхүү хэлэлцээрийн зорилго нь богино хугацааны зорчигч Хэлэлцэн тохирогч нэг талын иргэн өөрийн олон улсын жолоодох эрхийн үнэмлэхээр Хэлэлцэн тохирогч нөгөө талын нутаг дэвсгэрт тээврийн хэрэгсэл жолоодох, мөн Хэлэлцэн тохирогч нэг талын нутаг дэвсгэрт нэг (1) жилээс дээш хугацаагаар оршин суугч Хэлэлцэн тохирогч нөгөө талын иргэний үндэсний жолоодох эрхийн үнэмлэхийг харилцан хүлээн зөвшөөрөх, солилцох эрх зүйн зохицуулалтыг бүрдүүлэхэд оршиж байна.

Хэлэлцээр нь нийт 10 зүйл, хавсралтуудаас бүрдэж байгаа бөгөөд богино хугацааны зорчигчид нөгөө талын нутаг дэвсгэрт орж ирсэн өдрөөс эхлэн нэг (1) жил хүртэлх хугацаанд өөрийн үнэмлэхэд заасан тухайн ангиллын хүрээнд хамаарах тээврийн хэрэгслийг олон улсын жолоодох эрхийн үнэмлэхээрээ жолоодох эрхийг харилцан хүлээн зөвшөөрөх нөхцөлийг бүрдүүлэх юм.

Түүнчлэн аль нэг талын нутаг дэвсгэрт нэг (1) жил буюу түүнээс дээш хугацаагаар хууль ёсоор оршин сууж буй, 18 насанд хүрсэн нөгөө талын иргэд онолын болон жолоодлогын нэмэлт шалгалтгүйгээр, дүйцүүлэх хүснэгтийн дагуу хүсэлтээ гарган, өөрсдийн үндэсний жолоодох эрхийн үнэмлэхээ солиулахтай холбоотой харилцааг зохицуулсан. Энэ хүрээнд хүсэлт гаргагч нь өөрийн улсын үндэсний жолоодох эрхийн үнэмлэхийн эх хувийг, хүлээн авагч талын албан ёсны хэлээрх эсхүл англи хэл дээрх баталгаат орчуулгын хамт эрх бүхий байгууллагад нь хүлээлгэн өгнө. Хүсэлтийг хүлээн авсан эрх бүхий байгууллага өөрийн дотоодын хуульд заасан журмын дагуу холбогдох арга хэмжээг авч шийдвэрлэх юм.

Хэлэлцээрийг хэрэгжүүлэх эрх бүхий байгууллагуудаар Монгол Улсын Цагдаагийн ерөнхий газар, БНСУ-ын Үндэсний цагдаагийн газар ажиллах юм.

Энэхүү хэлэлцээрийн байгуулснаар хоёр улсын иргэдийн нөгөө талын нутаг дэвсгэрт богино хугацаагаар зорчих, хууль ёсоор оршин суух хугацаандаа жолоодох эрхээ баталгаажуулах, түүнчлэн үндэсний жолоодох эрхийн үнэмлэхээ солиулах

чиглэлд хоёр улсын эрх бүхий байгууллагууд өөр хоорондоо шууд харилцаж, түргэн шуурхай хамтран ажиллах боломжтой болох юм.

Одоогоор Бүгд Найрамдах Солонгос Улсад манай улсын 60 гаруй мянган иргэн оршин сууж, суралцаж, хөдөлмөр эрхэлж байгаа бөгөөд хоёр орны хооронд аялал жуулчлал, бизнесийн зорилгоор харилцан зорчих иргэдийн тоо тасралтгүй өсөж байгаа статистик мэдээлэл байна. Тухайлбал Гадаад хэргийн яамны Консулын газраас 2026 оны 5 дугаар сарын 15-ны өдөр ирүүлсэн мэдээллээр БНСУ-д богино хугацаанд зорчсон Монгол иргэдийн тоо 2022 онд 67,146, 2023 онд 141,638, 2024 онд 150,201, 2025 онд 161,755 болж жил бүр өссөн байна. Үүний зэрэгцээ Монгол Улсад зорчсон БНСУ-ын иргэдийн тоо 2022 онд 52,793 байсан бол 2025 онд 162,971 болж мөн адил тогтвортой өссөн үзүүлэлттэй байна.

Монгол Улсын “Замын хөдөлгөөний аюулгүй байдлын тухай хууль”-ийн 17 дугаар зүйлийн 17.4-т “Замын хөдөлгөөний тухай Венийн конвенцын гишүүн бус орноос олгогдсон жолоочийн болон олон улсын жолоодох эрхийн үнэмлэхээр Монгол Улсын нутаг дэвсгэр механикжсан тээврийн хэрэгсэл жолоодохыг хориглоно” гэж заасан бөгөөд Бүгд Найрамдах Солонгос Улс нь энэхүү конвенцыг соёрхон баталж нэгдэн ороогүй байна.

Иймд Олон улсын гэрээний тухай хуулийн 8 дугаар зүйлийн 8.1.3-т “дотоодын хууль тогтоомжоос өөр журам тогтоосон гэрээг заавал соёрхон батална” гэж заасны дагуу энэхүү хэлэлцээр нь заавал соёрхон батлах гэрээнд хамаарч байгаа холбогдох шийдвэрийн төслийг боловсруулан танилцуулж байна.

---oOo---